

## STRATA FACIENNU

Iu  
caminannu  
ppi strata m'addugnu ca 'a vita,  
se 'a spartu nô mienzu,  
jàvi gghià 'm piezzu ca sugnu ciù avanti.  
Vajiu :  
'Na sorta 'i trazzera  
ca scinni e 'ppuoi acciana,  
e sdirrubbi nê vosca e cuncuna  
e 'n puocu ri ciana  
se veni nun nùra  
e mai torna'n narrieri,  
ri prima, com'era .

E iu cuntu lu passu :  
'm prima cciù strittu,  
ora stiennu lu peri  
e sientu  
ca agghiuntu a stu puntu  
'u cientu  
è cciù vicinu 'i ravanti  
e s'allonca 'i rarieri.

'N luntanza si viri  
jàutu  
'n muru  
r'attuornu ntâ 'n uortu,  
ca 'u ciuri 'na porta,  
nô scuru.  
Ma prima ca arrivu ddà 'n funnu  
'nnumani ddà via  
o macari sta sira,  
iu  
supra 'nta curmu  
a ppèri putissi accianari,  
o cciù gghiàutu,  
'nucchiànnu tri quattru scali,  
supra ri 'm munti.....

ah....putissi abbulari !  
sulu n' minutu putissi,  
ccû l'ali,  
ppi virri nô scuru  
cchi c'èni 'ddabbanna 'i ssu muru  
e pustijari ntall'uortu  
cchi fannu  
'ssa gghènti  
ca ri tuttu 'u munnu ci vannu  
'bbulannu ccû l'ali.

E appuoi  
addumari putissi 'na luci  
e scròpiri ciaru  
se piaci  
e comu 'u tiempu cunnuci,  
e se è aruci  
o è amaru.

Ma mentri cci sugnu,  
cci pienzu,  
prima ca pierdu la spranza  
'n ca siennu ssa porta 'i passàgghiu  
'na sorta ri viagghiu  
sulu ppâ jùta,  
iu,  
cu 'u sapi,  
'm partenza, ccà, 'n'ucciàta cci rugnu  
'nca putissi truvàri  
'n amicu,  
nâ ciazza r'attuornu,  
ca mi prucurassi  
macari  
'u bbigliettu 'i rituornu.